



**REGIONE AUTONOMA DE SARDIGNA
REGIONE AUTONOMA DELLA SARDEGNA**

ASSESSORADU DE S'IGIENE E SANIDADE E DE S'ASSISTÈNTZIA SOTZIALE
ASSESSORATO DELL'IGIENE E SANITA' E DELL'ASSISTENZA SOCIALE

Pranu aingèriu de su vacinu contras a su Covid-dexenoi Ita tocat a fai po nai de eja e po si prenotai

Noa de su cinqu de martzu

Is Tzitadinus prus mannus de otanta annus (Over 80)

De **su primu de martzu** (01/03) is tzitadinus chi funt nàscius finas a su Milli-e-noixentus trintaseti (1937), e chi ddus nant “Over otantacincu” (Over 85), funt po arriciri, passu-passu, unu messàgiu (= SMS) in su tzellulàriu insoru po ddus cumbidai a nai de eja a su pranu a favori de su vacinu andendi a si arregistrai in su “Giassu web (= Portali) innui nai de eja a su pranu po si vacinai contras a su COVID-DEXENOI de sa Regioni Sardìnnia”.

Finas a **su catòdixi de martzu** (14/03), podint a craru nai de eja in su giassu is tzitadinus chi ant arriciu sceti su messàgiu (SMS) de cumbidu.

- De **su cuìndixi de martzu** (15/03), TOTU is tzitadinus prus mannus de otanta annus, e chi funt naus “Over otanta” (Over 80), est a nai is chi funt nàscius finas a s’annu Milli-e-noixentus corantunu (1941), ant a podi nai de eja po mesu de su giassu etotu, mancai su messàgiu (SMS) de cumbidu no ddu ant arriciu.

Is tzitadinus chi, faendi diaici, ant a espressai ca su vacinu ddu bolint fai, ddus ant a tzerriai is segreterias CUP (= Tzentru Ùnicu po anca si Prenotai) e ddus ant a cunvocai po ddus vacinai.

Diaici etotu, s’ ATS (= Sienda Amparu Sardìnnia) est promovendi custus atòbius in is logus cun sa punna de vacinai is tzitadinus prus mannus de otanta annus (OVER 80) cun s’agiudu de is Sìndigus e de is Dotoris de famìllia.

Comentisiollat, chini est strobaus a nai de eja imperendi is maneras arremonadas, de **su primu de abrili** (01/04) si-nci at a podi acostai a is portalitus CUP (= Tzentru Ùnicu po anca si Prenotai) chi ant a èssiri faineris, unu infatu de s’àteru, aciungendi oràrius spetzìficus, asinunca si at a podi prenotai unu atòbiu telefonendi a su nùmeru 1533, cun oràrius scioberaus apostu, finas su sàbudu e su domìnicu, segundu is inditus chi ant fai sciri infatu.

Chini traballat in is scolas

Scolas Stadalis: su personali imparadori e a chini no, aciungendi finas a su personali suprenti

Personali AFAM – [= Formatzioni Manna Artistica, de Mùsica e de Ballu] **(is imparadoris e a chini no)**

Basendisi-nci apitzus de sa lista chi su Ministèriu de s'Economia e de is Finàntzias at intregau a sa Regioni Sardìnnia, custu personali arremonau:

de **s'otu de martzu** (08/03) at a arriciri unu messàgiu (sms) de cumbidu a nai a craru de eja a su pranu de su vacinu andendi a si arregistrai in su "Giassu web (= Portali) innui nai de eja a su pranu po si vacinai contras a su COVID-DEXENOI de sa Regioni Sardìnnia".

Finas a **su catòdixi de martzu** (14/03), ant a podi a craru nai de eja in su giassu is tzitadinus chi ant a èssiri arriciu sceti su messàgiu (SMS) de cumbidu.

De **su cuìndixi de martzu** (15/03), TOTU is tzitadinus chi funt asuta de custa categoria, ant a podi nai de eja a su pranu intrendi in su giassu web (= Portali) etotu, mancai su messàgiu (SMS) de cumbidu no ddu ant arriciu.

Is tzitadinus chi, faendi diaici, ant a nai a craru de eja, ant a arriciri unu messàgiu (SMS) cun s'ora e su logu anca si presentai po fai su vacinu.

Capitendi chi su tzitadinu no tengat agradèssiu s'atòbiu, at a podi arrespundi issu etotu a su messàgiu (SMS) e ddu ant a cuntatai agoa po ndi fissai unu àteru.

A su personali de is scolas no stadalis ddu ant a informai cun noas chi ant a sighiri.

Universidadi: a su personali imparadori e a chini no

Funt afateriendi-sì a fai sa vacinatzioni de su personali imparadori e de chini no, a truessu cuntatus deretus intra is Univesidadis de sa Sardìnnia e is Siendas spidaleras chi ant apariciau is logus aposta po fai su vacinu a su personali arremonau.

S'Assessori